

অর্থাৎ ভক্তির স্বরূপেই এমন সামর্থ্য আছে যে, নিজ আশ্রিতজনের সর্ব অযোগ্যতা দূর করিয়া সর্বপ্রকার যোগ্যতা সম্পাদন করিয়া লয়েন। এইজন্য ভক্তিসাধনের সাধকের পক্ষে অন্য কোনও যোগ্যতার অপেক্ষা করে না, কেবলমাত্র ভক্তিতে দৃঢ়বিশ্বাসেরই অপেক্ষা আছে। এইজন্য পরে শ্রীকৃষ্ণই বলিবেন—

তস্মান্ভুক্তিযুক্তস্ত যোগিনো বৈ মদাত্মনঃ ।

ন জ্ঞানং ন চ বৈরাগ্যং প্রায়ঃ শ্রেয়ো ভবেদিহ ॥

যৎ কৰ্ম্মভিৰ্যতপসা জ্ঞানবৈরাগ্যতশ্চ যৎ । ইত্যাদি । ১১।২।৩১-৩২

হে উদ্ধব ! এই তো তোমার নিকটে কৰ্ম্ম, জ্ঞান ও ভক্তির ত্রিবিধ অধিকারীর কথা উল্লেখ করিলাম। তন্মধ্যে জ্ঞান ও কৰ্ম্ম নিয়ত ভক্তিয়োগের মুখ্যাপেক্ষী ; ভক্তিয়োগ কিন্তু কৰ্ম্ম ও জ্ঞানের কোন অপেক্ষাই করে না। এইজন্য ভক্তিয়োগ নিখিল সাধন হইতে অতিশয় শ্রেষ্ঠ। আমাতে আনন্ত-চিন্তা—এমত ভক্তিযুক্ত সাধকের পক্ষে প্রায়শঃ জ্ঞান বা বৈরাগ্য মঙ্গল-সাধন হয় না। যেহেতু রাশি রাশি কৰ্ম্মে, তপস্যায়, জ্ঞান, বৈরাগ্যে, অষ্টাঙ্গযোগে, দানধৰ্ম্মে—এমন কি তীর্থযাত্রা, ব্রত প্রভৃতি নিখিল মঙ্গল-সাধনে যে চিন্তাশক্তি প্রভৃতি ফলপ্রাপ্তি হইয়া থাকে, আমার ভক্ত ভক্তিয়োগ প্রভাবে অনায়াসে সেই সকল ফললাভ করিতে পারে। অতএব, ভক্তিয়োগ যে অন্যনিরপেক্ষ, তাহা সুস্পষ্টরূপেই উল্লেখ করা হইয়াছে। হয়ত কেহ মনে করিতে পারেন—যখন “নির্ব্বিঃ সৰ্ব্বকৰ্ম্মশু” অর্থাৎ “নিখিল কৰ্ম্মানুষ্ঠানে নির্বেদপ্রাপ্ত”—এইরূপ উল্লেখ আছে, তাহা হইলে ভক্তিয়োগ কেমন করিয়া সর্বপ্রকারে নিরপেক্ষ হইতে পারে ?

তাহার উত্তর এই যে—ভক্তের যখন ভক্তির উপরে সর্বোত্তমা বিশ্বাস আসিবে, তখন স্বভাবতঃই কৰ্ম্মাদি অনুষ্ঠানে নির্বেদ আসিবেই। তবে শ্লোকে যে কৰ্ম্মযোগে নির্বেদের কথা উল্লেখ আছে, সেটি কিন্তু অনুবাদ মাত্র ; অর্থাৎ ভক্তিয়োগের স্বভাবে প্রাপ্ত নির্বেদের কথাই স্পষ্টরূপে পুনরুল্লেখ করা হইয়াছে। অতএব, যদিও জ্ঞান এবং কৰ্ম্মসাধনেও শ্রদ্ধার অপেক্ষা আছেই, যেহেতু কোনও সাধনে শ্রদ্ধা ভিন্ন বাহিরে ও ভিতরে প্রবৃতি হইতে পারে না। যে কৰ্ম্মে যাহার শ্রদ্ধা নাই, সে কৰ্ম্মে যাহার বাহ্যস্তরে আবেশ আনিতে পারে না ; অথচ আবেশবিনাও কোন কার্যে কেহই সিদ্ধিলাভ করিতে পারে না। অতএব, জ্ঞানকৰ্ম্মসাধন অনুষ্ঠানেও সাধকের শ্রদ্ধার অপেক্ষা আছে, তথাপি ভক্তিসাধনে কেবলমাত্র শ্রদ্ধাকেই কারণরূপে নির্দেশ করার জন্য ভক্তিমাগে শ্রদ্ধাকেই বিশেষরূপে স্বীকার করা হইয়াছে।